

ընդ այն զուարճանային անյագ խնդութեամբ, հրաժարեալքն եւ մնացեալքն: 9 Եւ ողջունեալք զմիմեանս սուրբ քահանայիցն եւ նախարարացն Հայոց՝ յուղարկեալք գնային, կոչեցեալք ի պսակումն: 10 Եւ երթեալք սուրբ քահանայքն Աստուծոյ՝ կազմէին ճեպով եւ այլ մանկունք ի սպասաւորացն երանելեացն, որք եկեալ էին ընդ նոսա ինքնակամ յաւժարութեամբ յաշխարհէն Հայոց, արբանեկել նոցա եւ սպասաւորել ի կապանսն, որք եւ վիճակի բարւոյ մասինն լինել արժանիք տենչային: 11 Եւ մանաւանդ առաւել խորէն երեց, որ էր ի գաւառէն Այրարատու¹, ի գեղջէն որում անուն էր Որկովի, եւ երանելին Աբրահամ երեց, որ էր ի գաւառէն Տայոց, ի գեղջէն որում անուն էր Չենակա: 12 Չոր տարեալ² Վեհղենշապիոյ եւ որք ընդ նմայն էին, եւ հարցեալ թէ «դուք յո՞ կազմիք». եւ լուեալ ի նոցանէ, թէ «ուր զհոգեւոր տեսարսդ մեր եւ զվարդապետս տանիք՝ ընդ դոսա պատրաստ եմք երթալ, ի կեանս կամ ի մահ»: 13 Եւ սրտմտեալ Վեհղենշապիոյ՝ հրաման տայր բռնաբար ունել զնոսա եւ պահել անդէն ի շահաստանին. պատուէր տայր ըստ առաջին հրամանին զգուշանալ նոցա բազում պահպանութեամբ մինչեւ ցժամանակ մտանելոյ ամենայն զաւրացն արքունի յոստանն. «Եւ ապա, ասէն, իշխեսցէ ծառայ որ կապելոց նախարարացն Հայոց ելանել ի շահաստանէն ի պետս արբանեկութեանն, ո՛ւր եւ առաքեսցեն տեսարքն իւրեանց»: 14 Չոր իբրեւ տեսեալ երանելեաց քահանայիցն խորենայ եւ Աբրահամու զբռնաբար դահճացն արգելուլն զնոսա անդէն ի շահաստանին՝ մեծապէս խռովեալք տրտմէին, հաշուելով անարժան զանծինս այնպիսի երկնաւոր պսակի, զոր եւ առնլոց են սուրբ վարդապետք նոցա, որդիք նահատակին Գրիգորի:

ԾԴ. Չուէր այնուհետեւ ամբարապետն Վեհղենշապուհի հանդերձ քահանայիւքն ի Նիւշապիոյ, ի վեցերորդ ժամու աւուրն, ընդ ճանապարհն որ ելանէ ի Վրկանն: 2 Եւ լուեալ զայս առն միոյ վաճառականի, որ էր ազգաւ Խուժիկ, որոյ ըստ աւրինի վաճառականութեան շատ անգամ ճանապարհորդեալ էր ի Հայս, որ եւ զլեզու հայերէն խաւսից քաջ տեղեկաբար գիտէր. եւ էր ինքն այր ի մանկութենէ իւրմէ կեցեալ առաքինի վարուք, եղեալ որդի քրիստոսասէր եւ հաւատացեալ ծնողաց, որ եւ զերանելի քահանայսն Աստուծոյ եւ զնախարարսն Հայոց որ ի կապանսն էին՝ յոյժ ընտանութեամբ գիտէր. առ որս եւ բազում ծախս յընչից եւ սպասաւորութիւն արարեալ էր, մինչ ի Վրկանին էին, ուշադրելով զամենայն աւր եւ ակն ունելով³ մասին նշխարաց սրբոցն ի կատարումն նոցա լինել արժանի: 3 Սորա լուեալ զհրաման թագաւորին՝ ճեպով եւ անյապաղ, ոչինչ զգացուցեալ⁴ ումեք, թողոյր եւ

1 Ձ. որ ի գաւառէն էր արայրատու

2 Թերեւս՝ զոր տեսեալ

3 Ձ. ակն ունել

4 Ձ. զգացուցեալ